



國朝耆獻類徵初編卷首之九

通奉大夫前署江西巡撫江西布政使司布政使臣李桓恭錄

欽定宗室王公功績表傳卷九

傳七 貝勒

和碩貝勒阿敏傳

阿敏

顯祖宣皇帝孫追封莊親王舒爾哈齊第二子初授台吉歲戊申

三月

太祖命同長子褚英征烏拉宜罕山城克之斬千人獲甲三百俘其眾以歸癸丑正月從

上征烏拉布占泰以三萬眾迎拒諸將欲戰

上止之阿敏偕貝勒代善等奏曰布占泰已出舍不戰何耶

上遂決進克其城滅之丙辰

太祖建元天命封和碩貝勒以齒序阿敏爲二貝勒四年三月從  
上破明兵於薩爾滸山及尙閒崖復奉

命禦明總兵劉綎於棟鄂路代善等繼之陣斬綎阿敏偕大臣扈  
爾漢擊敗明游擊喬一琦兵一琦奔固拉庫崖與朝鮮都元帥姜  
功烈合營阿敏同諸貝勒攻之功烈降一琦自縊八月從

上征葉赫滅之六年三月從

上取明瀋陽遼陽七月鎮江城中軍陳良策叛投明將毛文龍阿

敏遷鎮江沿海居民於內地十一月文龍屯朝鮮阿敏渡鎮江夜入朝鮮斬其守將及兵千五百文龍僅以身免十一年四月征喀爾喀巴林部取所屬屯寨十月征扎嚕特部俘其眾天聰元年正月同貝勒岳託等征朝鮮瀕行

諭曰朝鮮累世獲罪理宜聲討然此行非專伐朝鮮也明毛文龍近彼海島納我叛民故整旅徂征如朝鮮可取並取之因

親授方略是月大軍薄義州拔其城分兵擣文龍所居鐵山文龍敗歸海島師克宣川連定三城次平壤朝鮮王李倭遣使請和阿敏書數其罪七次黃州倭復請和阿敏欲進攻諸貝勒議許之事詳克勤郡王傳凱旋

上郊勞於武靖營

賜御衣一襲五月從

上征明錦州復圍甯遠擊斬千餘人四年正月大兵克永平灤州  
遷安三月

命阿敏代貝勒濟爾哈朗等駐守師至合略迤西路並招降榛子  
鎮四月諭歸降漢文武官曰我國法度從來賄賂不行廉者舉之  
貪者勿錄況

皇上簡用者俱廉潔忠直之輩爾等若有罪雖賂千金無益若無  
罪卽眾貝勒何懼焉五月明監軍道張春等圍灤州阿敏怯不往  
援灤州陷阿敏遽棄永平殺降者夜出冷口歸六月

上御殿諸貝勒大臣議阿敏十六罪

上命岳託宣示於眾諸貝勒大臣合詞請誅阿敏

詔特宥其死削爵幽禁崇德五年十一月卒於幽所爵除



多羅誠毅貝勒穆爾哈齊傳

穆爾哈齊

顯祖宣皇帝第二子初授台吉以功

賜號誠毅歲乙酉四月從

太祖高皇帝征哲陳部嘉哈部長蘇庫賚呼密告哲陳部主於是  
托摩和章嘉巴爾達薩爾濟界藩五城集兵以待

上執麾前進穆爾哈齊及近侍延布祿烏靈阿皆奮勇直入重圍  
斬二十餘級敗其眾涉渾河走穆爾哈齊復隨

上渡河躡其後至吉林崖見兵由旁徑來

上慮爲彼見去冠纓隱身以待射前至者一人貫脊而殪穆爾哈

國朝書局裝釘不絕  
齊復射殪其一餘多墜崖死

太祖曰今日之役以四人敗八百眾

天助我也天命五年九月卒年六十

上親奠順治十年六月追封多羅貝勒諡曰勇壯爵除

多羅篤義貝勒巴雅喇傳

巴雅喇

顯祖宣皇帝第五子初授台吉歲戊戌正月

太祖命同長子褚英征安楚拉庫路夜取屯寨二十降萬餘人

賜號篤義丁未四月

命征東海高集部取赫席赫鄂謨和蘇嚕佛訥赫托克索三路俘  
二千人天命九年九月卒年四十有三順治十年五月追封多羅  
貝勒諡剛果爵除



多羅廣略貝勒褚英傳

褚英

太祖高皇帝第一子初授台吉歲戊戌正月

上命征安楚拉庫路以功

賜號洪巴圖魯尋封多羅貝勒初東海瓦爾喀部斐悠城長策穆  
持赫苦烏拉布占泰之虐乞移家歸附丁未正月

命同貝勒舒爾哈齊代善率兵徙之軍夜行陰晦忽大纛上有光  
眾以爲異捫視無有復建之光如初舒爾哈齊曰吾幼從

上征討所閱事多矣未見此異疑非吉兆欲班師褚英同代善持  
不可曰吉凶兆已定遽還何以報

命決進抵斐悠城收其屯寨五百戶令大臣扈爾漢衛之先行兵  
僅二百布占泰以萬眾邀諸路傷我一人大將揚古利斬其七人  
乃卻褚英與代善至策馬前諭軍士曰

上每征伐無不以少擊眾今雖未親行閒我等奉

命來此爾眾無憂昔擒布占泰宥歸俾主其地時不久背恩如故  
今豈不能再縛之眾皆曰願效力褚英遂與代善各率兵五百夾  
擊天方晴明忽大雪寒冽烏拉兵大敗斬其統兵貝勒生擒貝勒  
常住瑚哩布及常住之子死者相枕藉獲馬五千甲三千  
上以褚英率先敗敵嘉之復

賜號廣略戊申三月同貝勒阿敏征烏拉宜罕山城克之布占泰

與蒙古科爾沁貝勒翁阿岱合兵出烏拉城二十里遙望我軍知  
不可敵相約還復以失宜罕山城大懼遣使來盟乙卯閏八月褚  
英以罪伏誅爵除



多羅貝勒芬古傳

芬古

顯祖宣皇帝孫追封莊親王舒爾哈齊第八子天聰五年三月授  
鑲藍旗都統八月隨

上征明抵大凌河芬古率本旗兵圍城之西南時貝勒阿濟格敗  
明兵於松山

上將幸其營城中兵來突芬古等夾擊大敗之九月

上令軍士向錦州幟而馳如明援兵狀距城十里礮聲不絕總兵  
祖大壽統眾出西南隅攻軍臺芬古等迎擊大壽敗回不敢出七  
年六月

詔問征明與朝鮮察哈爾三者何先奏言我軍蓄銳已久勢可用  
宜卽入明邊毀其城堡戮力進取何憂無成八年七月從

上征明同貝勒德格類進師獨石口七月克長安嶺殺其守備官  
攻赤城克其郭復入保安州謁

上於應州城籍俘獲以獻九年五月

命芬古等隨貝勒多鐸入甯錦界牽制明兵俾毋援山西大壽營  
大凌河西我軍擊敗之崇德元年五月隨武英郡王阿濟格等征  
明薄延慶州先後克城十十二月從征朝鮮同都統譚泰以騎入  
其城朝鮮王遁盡收其輜重而還敘功封固山貝子四年五月坐  
取外藩蒙古賄削爵八月復封輔國公六年八月大軍圍松山明